



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

**Sarath Reddy ket nungi BJP-i sen
crore 50 agizük: Sanjay Singh**

**Phogat-i tetsür 50kg Paris
Olympics quota nguogo**



VOL. XXI ISSUE NO. 188 (ADOK 188) DIMAPUR AMUNGNÜ (SUNDAY) RONGCHII (APRIL) 21, 2024 ₹ 5.00

Mkg district nung BioPlastic manufacturing unit lapok Polling nung shilem magiba ajanga onok tejashi sayuogo: ENPO

Dimapur, April 20, 2024 (Agencies): Honibarnü Mokochung kübok Changtongya Yimsen nung Northeast nung mezüngbuba Eco starch BioPlastic manufacturing unit lapokogo.

Iba unit ya North East Centre for Technological Application and Reach (NECTAR) ajanga teyari agüja lapok.

"Linük nung technology dak sendakba lenmangtem bushitepsü aser Northeast region nung amenoktsü atema iba mapa inyaker" ta NECTAR Director General Dr. Arun Kumar Sarma-ashi.

NECTAR indang tongtipang mapaji technology prokshitsü,

raw material amshitsü aser technology ajanga loktiliba tashi itdaksütsü atema lir, ta pai ashi.

NECTAR ajanga Northeast nung scheme aika tenzüka lir anungji lanurtemi item scheme nungi tajangzük agitsü ayongzüker. NECTAR-i akokba tashi Northeast nung aliba raw materials ajanga units aser plants lapoktsü" ta Director General Sarma-isa ashi.

Northeast nung banana fiber extraction, areca nut plate making, pineapple canning aser tea dak sendakba mapa balala inyaksü kechiyong item maparen asoshi lenmang sadema lir ta paisa ashi.

Kohima, April 20, 2024 (TYO): Eastern Nagaland nungeri tejashi sayua polling nung shilem magi aser iba ya ozü temeten atema inyakra lir ta Eastern Nagaland Peoples' Organisation (ENPO)-i anir telok balalai Honibarnü metetdaksüogo.

ENPO, kin hohotem, ENWO aser ENSF külemi yaritepa Eastern Nagaland district 6 nung 18 buba Lok Sabha election nung shilem magi süidaksüogo ta Media Cell, Eastern Nagaland Public Emergency-i sangdong ka nung ashi.

Eastern Nagaland kübok polling stations 738 nung vote ka danga majen aser iba ajanga nübor ajungai tejashi sayuba den külem ola pusema sayur, ta Media Cell-i ashi.

"Sorkar tashi bena alirtemi Eastern Nagaland nungeri senzuka mayutsüla aser tebang menembangtsüla ta iba ajanga osang tejangja sangoktsür. Iba ajanga Eastern Nagaland nungeri tesüiba dang nungi telongjemba

lir ta sayuogo" ta ENPO-isa ashi. Onok ola mangashi tashi aser onok taginübatem matalok tashi onoki mera talila agitsü mulunga lir ta ENPO-isa metetdaksü.

ENPO, kin hohotem, ENWO aser ENSF-isa senso ajak dang pelaba metetdaksüogo. Eastern Nagaland nungeri timtemba mapang Sumi Youth Organization aser Dimapur Ao Youth Organization-i onok asoshi aria bilemetsüba aser pusema nungitba atema kanga pelar ta parnokisa ashi.

Public-i shilem agiba aser amalitep aliba ajanga asenok külem nükjidong aser alizüngtem tongtettsü aser iba ajanga asen tarutsü putu tia tajungba kümdaksütsü ta parnokisa metetdaksü.

"Eastern Nagaland nungeri DAN-1 nungi tenzüker tang tashi Nagaland Chief Minister lenisüba nungita aruba atema pa pelaya alitsü aser tenüngsang agütsür asütsü ta onoki amanger" ta ENPO-isa ashi.

Chief Minister-i Eastern Nagaland nungi MLA 20 aser Eastern Nagaland region nungi sorkar mapa inyakerem dak meküpzüksü ayongzüker, ta parnokisa ashi.

Parnok dak langka danga atalokra Eastern Nagaland nungeri parnok pusema nungitsü ta ENPO-isa ashi.

ENPO aser teloktemi sensotem dang social media sabangtem nung lennir, kija mesüra telok shinga anema mejembitsü metetdaksüogo.

Eastern Nagaland mokdangba agienogo

Eastern Nagaland ajunga mokdangba tanü nungi agienogo ta Eastern Nagaland Public Emergency-i tanga sangdong ka nung metetdaksüogo.

"Eastern Nagaland Public Emergency Control Room, Tuensang Hq-i April 18, 2024 nikongdang 6:00 ako nungi tenzüka mokdang agienogo. Koda masüba timtem ajuruba atema saras" pamoki sangdong nung ashi.

Assam sorkari school yangkhu touzük latettsür

Guwahati, April 20, 2024 (Agencies): Assam state sorkari academic session 2024-25 nungi school yangkhu taret mebendaksütsü tetuyuba ka agütsüogo.

Assam education department-i class balala lemsar school yangkhu touzük metetdaksüogo aser iba ajanga kaketshirtem kanga anisüngzüksü.

Class 1 aser 2 nung kaketshirtem atema school yangkhu touzükj ki seret 1.5-2 lir. Class 3 nungi 5 atema seret 2 nungi 3, Class 6 nungi 8 atema seret 3 nungi 4 aser Class 9 o 10 atema

seret 5 touzüktem latettsüogo.

Kaketshirtem tekolok aser temang timi ayutsü tangatetba nung school yangkhu touzük ajemtsütsü lemtet. Kaketshirtemi school yangkhu taret abenba ajanga temang aser tekolok nung timtem agütsür ta asüba tebilemetsü agizüka sorkari iba mapa inyaker.

Union Human Resource Development Ministry-i tetuyuba ka agütsüba sülen 2018 küm Assam sorkari school yangkhu atema tetuyuba ka agüja liasü saka school ketdangsurtemi ibaji meinyak.

Likimro HEP tower nungi osettem auya



Dimapur, April 20, 2024 (TYO): Pungro jila anasa 66kV Kiphire-Likimro Transmission Line indang 66kV Double Circuit tower ka laoba ajanga Likimro HEP nung timtem ajurua lir.

Double Circuit tower indang oset kar auyaba ajanga April 20, 2024 anepdang nungi power generation nung timtemer, ta Executive Engineer, Transmission Division Kohima-i sangdong ka nung metetdaksü.

66kV Kiphire-Likimro

Transmission Line ya Likimro HEP atema kanga dang tongtipang transmission line ka lir aser State Power transmission Grid nunga kanga tongtipang ta Executive Engineer-i ashi.

Power Department-i akokba tashi laoa aliba tower mesotsü atema mapa inyakdar aser ozüng amertemi tower oset auyartem aputsü mepishir ta paisa ashi.

Executive Engineer-isa nüboritem dang tower osettem mauyatsü mepishia metetdaksüogo.

CEO Manipur-i polling station 6 nung re-poll asütsü abener

Imphal, April 20, 2024 (Agencies): 2024 Lok Sabha Elections atema Chief Electoral Officer-i Manipur nung kübok polling stations 6 nung re-poll asütsü asügangdango.

Joint Chief Electoral Officer, Manipur Ramananda Nongmeikapam-i iba atema Election Commission of India dangi shidi ka zülüogo.

April 19 nü 1-Inner Manipur Parliamentary Constituency nung polling asügang polling station aika nung ozüng alema mapa inyaka liasü.

1-Inner Manipur Parliamentary Constituency nung

Returning Officer-i Chief Electoral Officer, Manipur dang tesem aika nung polling maparen shitak meinyaktetba osang metetdaksü.

Moirangkampu Sajeb Upper Primary School (3/11), Khongman Zone (5/31), Iroisemba Upper Primary School (10/1) Eastern, Western (10/6) aser Middle (10/7) wings nung polling maparen shitak meinyaktet.

Item tesem nung nisung teloktemi security personnel amokbang aser Electronic Voting Machines (EVMs), Control Units (CUs), Ballot Units (BUs) o Voter

Verifiable Paper Audit Trail (VVPAT) machines raksaja liasü.

Maneni, Khaidem Makha (18/22) nunga mejangjatetba nisung telok kati votes 61 shi ka ajenba ajanga polling maparen nung timtem ajurua liasü. Security forces-i mapang shitak nung voting machines kümzüka ayu saka tensa mejungi akümba ajanga polling mesütet.

Representation of the People Act, 1951 nung section 58 nung sub-section (1) kübok Election Commission of India dangi shidi zülüogo aser iba section nung sub-section (2) nung ajemdaker tetuyuba agütsütsü mepishio.

Nagaland Police-i drugs shibelener Hasan Mamu apu

Dimapur, April 20, 2024 (TYO): Nagaland police-i ano takok anguba osang ka lemsatepogo aser ibaji Dimapur nung mozü shibelener ka apuba lir.

Iba nisung ya Tamij Uddin'er jabaso Md. Hassan Uddin (Hasan Mamu) lir aser pai Murgi Patti nung medical shop ka lapoka lir.

Iba nisung yagi mozü shibelenerba mapa inyakra osang angazükba sülen Nagaland police-i Arunachal police aser West Bengal police den külemi bushisüngdanga arur Arunachal Pradesh nung Hassan Uddin apu, ta Nagaland Police-i ashi.

Hasan-i India Post ajanga Dimapur nungi West Bengal-i morphine yok. Pai Moreh nungi

morphine bener aru aser postal delivery system ajanga parcel asü. February 2024 nung West Bengal police-i Barrakpore West Bengal nung Rs. 8 crores alang morphine seret 2 apu.

Hasan ya narcotics dak sendakba ken o aika nung tai tonglokja lir aser pa den külemi par adianu Kamal Uddin nati iba mapa inyakra aru ta Nagaland Police-isa ashi.

Ano, tanga tatalokba ka nung tai tongloka alir nisung asem puogo. Parnok ta taoba mapang drug shibelenerba nung shilem agirtem lir aser bail nung lia parnoki maneni drugs shibelen ta Nagaland Police-i metetdaksü.

Nagaland Police-i 'War Against

Drugs' atema bendanga agüja inyaker aser synthetic drugs o psychotropic substances talubosa amshiba azüoktsü. Police-i drugs shibelenerba noktangtsü atema garitem mita repranger (MVCP) aser hotels, restaurants amala mita aoter ta metetdaksüogo.

"Nagaland State FSL nung drugs sample tekaraba nung analysis asütsü facility liasü saka tang Nagaland police-i 4K Spectral Camera bener arua amenokogo aser iba ajanga fingerprints kanga junga jangjateter" ta Nagaland Police-i ashi.

Nagaland Police-isa nüboritem dang drug ayokertem aser shibeleneritem osang maneni sangoktsütsü mepishio.

Kohima aser Chumoukedima nung strong room shibangogo



(Abelen) Kohima District atema General Observer-i tashi agütsür aliba Micro Observer Kreho Athili, DC & DEO Kohima Kumar Ramnikant, IAS, AROS aser INC o NDPP party nungi representative tem April 19 nü DC Office Kohima nung Strong Room shibangba sülen tangokba noksa nung angur. (Achiji) April 19 nü DC office complex, Chumoukedima Sealing nung Strong Room shibangba noksa nung angur.

Dimapur, Rongchii/April 20 (TYO): Kohima district nung April 19 nü Lok Sabha election inyakyim tembangba sülen kasa anogo DC Office Kohima nung polled EVM tem yua aliba strong room vote mazung tashi melapoktsü atema shibanga yuogo.

Iba takdang shibangba mapang Kohima District atema General Observer, P. Ramesh, IAS, tashi agütsür aliba Micro Observer Kreho Athili, DC & DEO Kohima Kumar Ramnikant,

IAS aser ARO tem den INC aser NDPP representative tem densema liasü.

Strong room kanga junga kümzüka ayutsü atema ketdangsürtemi jenjang tapet agiogo aser temelaba malirtem iba takdang maitsü aser tampering nungi jenboa alitsü atema security inyakyim aser surveillance tapet amenoktsüogo. June 4 nü vote mazung tashi strong room ya kanga junga meita atatsü.

Kasa mapang nung DC

office Complex, Chumoukedima nunga AEO & ADC, Dr. Kuzonyi Wideo and AEO & ADC, James Swu-i, EVM Receipt aser dispatch counter indang strong room shibanga yuogo.

Strong room ya DEO & DC Abhinav Shivam, IAS, Observer Avinash Chauhan, IRS aser Chumoukedima District kübok 4th A/C Ghaspani-I aser 5th A/C Ghaspani-II nungi ketdangsürtem matsügang shibangja liasü.

Assam: Ghonda 48 lir NC Hills EM adianu chiokogo

Guwahati, Rongchii/April 20 (Agencies): Tenokdangba agütsür aliba telungpur telok United Dimasa Liberation Army zungsemtemi Haflong, Assam nungi North Cachar Hills Autonomous Council's Executive Member adianu pur aoba sülen ghonda 48 lir chiokogo.

United Dimasa Liberation Army (UDLA) puri pur aoba sülen ghonda 48 lir Prasenjit Naiding chiokogo. Dima Hasao police-i, Prasenjit Naiding ya Hokolbarnü nikongtsütsü 4 ako nung Reserve Forest nungi kümzüka liasü.

Honibarnü osangbenertem den sensaksemba mapang Dima Hasao District Superintendent of Police Moyank Kumar-i, Prasenjit Naiding ya April 17 aonung nungi samara bushia liasü, ta ashi.

April 18 nü nikongtsütsü 6 ako nung Hembanan Parbacha ta ser Dimapur nungi telungpur

asütsü ta temulung melemibilemba nisung kati Monjit Naiding dangi call sür Prasenjit Naiding parnok ket nung lir aser pai police nem osang agütsüra pa adianu ya yirutsütsü ta ashi. SP-i ashiba agi, nisung pur aoertem yagi pa indang Facebook page nung AK-47 prangbong amer iba telok nungi zungsem ana tangokba noksa ka lemsatop. SP-isa, telungpurtem yagi Prasenjit Naiding tenük zübangtsüba den teka tesülen alener telungpur ana den tangokba noksa ka lemsatopa liasü, ta ashi.

Prasenjit Naiding ya Dimapur railway station nung chiok. Pa Dimapur nungi train ajanga Lumding-i anir ao aser iba sülen pai pa adianu Monjit Naiding dangi call süa liasü.

Pa dang ken o ashishiba sülen Prasenjit Naiding-i pa pur aoba otsü ya pasasa zülu ta police temi jangja aküm. SP ashiba agi,

Prasenjit Naiding ya April 17 aonung telungpur telok kati par kidang nungi pur ao ta bilem saka aji tai liasü. Pa pur aotsü atema Prasenjit Naiding aser pa den alisang Satiljit Naiding nati tasa asa.

Jurila tebilemstü kar aliba ajanga Prasenjit Naiding-i Dima Hasao district nung melenü liasü. SP-isa, Prasenjit tebilemstü bentettsütsü aser nüburttem nem meima bilemdaktsütsü atema Satiljit Naiding aser Hembanan Parbacha nati tasa asa, ta ashi.

Kumar-i ashiba agi, Prasenjit ya April 17 nü 2 ako nung Sahiljit indang Maruti gari nung mener Dimapur-i ao aser parnok Dimapur-i aoba indang video-a ka lir aser iba tasa tamajung asaba atema temzung ozüng kübok Prasenjit anema jenjang tapet agitsü. Paisa, Prasenjit Naiding kümzükogo saka Satiljit Naiding tang tashi monguteti lir, ta ashi.

Meghalaya CM Sangma vote agütsüi kisüng oa ghonda asem nokdak



18th Lok Sabha election mapang Meghalaya nung Tura Assembly Constituency kübok Walbakgre polling station nung vote agütsütsü atema Meghalaya Chief Minister Conrad Sangma nokdaka aliba noksa nung angur.

Tura, Rongchii/April 20 (Agencies): 18th Lok Sabha election nung vote agütsütsü atema Meghalaya Chief Minister aser National People's Party (NPP) tir Conrad Sangma pa kisüng Tura nung aliba polling station-i ao aser pa indang vote agütsütsü ghonda asem

jungnüa ata liasü. Vote agütsür mezümpur nung adentsü teimla nung Meghalaya CM Conrad Sangma ya anepdang 6:30 ako nung Walbakgre polling station tonga aru.

Ajisüaka pa indang vote agütsütsü asoshi mapang talangka atatsüsa aküm.

Pei vote pei sasa agütsüdaktsütsü mechi pa indang security personnel, driver aser par telok nung zungsemtem pei polling station bushia yok, ta CM Sangma-i ashi.

Par kidang nungi polling station tashi pa sasa gari anir aotsü mulungtet aser nisung shiai pei democratic temeden amshitsü kanga tongtipang ta ashi.

"Na vote agütsütsü temeden amshiang - ibai nü ola, nü tashi aser nü tarutsü tia. Vote ajak azünger!" ta Meghalaya CM Conrad Sangma-i ashi.

"Ni anepdang 6:30 ako nung polling station atongdang, yangi nisung 200 shi liasü, anungji nüburttemi tejangraba tulu nung vote agütsüba ajiteter. Iba election nung vote agütsür jenti alitsü," ta pai ashi.

Polling station ka ansa khatepba atema nisung 3 puogo

Imphal, Rongchii/April 20 (Agencies): Imphal East district kübok polling station ka ansa khatepba nung densema aliba atema Manipur nung police-i nisung asem puogo.

April 19 nü Imphal East district kübok Moirangkampu Sajeb nung vote agütsüba mapang khatepba nung shilem agiba atema nisung asem ya puogo.

Iba khatepba lendong nung nisung ka yirua liasü.

Khatepba sülen par asem ya gari ka nung jena aotsü merang saka Hokolbarnü

nikongtsütsü puogo. Parnok ya iba lendong atalokba tesem nungi kilometer 5 shi pilar or lia apu. Parnok apuba sülen Manipur police-i .32 pistol ka den injang aser sen lakh 1.5 shi parnok ket nungi ngutetogo.

Aija alirtem ya Leichombam Jemson Singh (34), Nongthombam Ratan (47) aser Khumukcham Angamba (32) ta jangjaogo.

Iba dak sendakba nung ken o ka benokogo aser maneni bushisügang südar.

NE nung mezüngbuba Bio Plastic manufacturing unit Mkg district nung lapokogo



Mokokchung, Rongchii/April 20 (TYO): Northeast nung mezüngbuba Eco starch Bio Plastic manufacturing unit Honibarnü Mokokchung district kübok Changtongya Yimsen nung lapokogo. Iba unit ya North East Centre for Technological Application and Reach (NECTAR)-i senotsü teyari agüja lapokogo.

Manufacturing unit lapokba sentong nung o jembiba mapang Director General of NECTAR, Dr. Arun Kumar Sarma-i ashiba agi, linük nung technology dak sendakba nung Northeast kübok kinük nung aliba tesemtemi itema ya bener aotsü atema parnoki tongtibangsa inyaker. Paisa, NECTAR indang tongtibangtiba tinyaktsüji, technology ayimsünga prokshidaktsütsü, tesem ka nung raw material technology amshia lokti nem tashi agütsütsü atema lir, ta ashi.

Director General-isa, Northeast nung NECTAR-i achaayangba scheme balala indang metetdaktsü aser lanurtem dang item scheme tem maangka agitsü ajungshiba den, NECTAR-i raw materials kechi angur iba dak ajemdaker unit aser plant tem amenoktsü atema takokba tashi teyari agütsütsü ta tenangzükbaga agütsü.



April 19 nü Kiphire District kübok Old Manger village, Sitimi Town aser Matriki (Yingshikiur) nung jendang densema kitem, electric intong aser PHE pipeline yipru mopung agi raksatsüogo



April 20, 2024 nü Jammu nung BJP senden ka tembangba sülen BJP National General Secretary, Tarun Chugh aser Union Minister Jitendra Singh na den tangartem noksa nung angur.

Lok Sabha constituency teimbaka nung taküm votes ishiba agütsü

New Delhi, April 20 (Agencies): April 19 nü Lok Sabha elections mezüngbuba shilem nung menden 102 atema election agiogo, ajisüaka 2019 küm election den medemdangra item constituency teimbaka nung taküm vote agütsür ishiba liasü.

Election mezüngbuba shilem nung voters shilem 68.31-i vote agütsü aser ibaji 2019 küm Lok Sabha election mezüngbuba shilem dang nungi tajemba lir.

Hokolbarnü voters shilem teimtibai vote agütsübaji Lakshadweep (83.88%) nung liasü, iba sülen West Bengal (81.91%) aser Tripura (81.62%) liasü.

2019 küm election den medemdangra taküm constituency teimbaka nung voters kanga tajemba liasü.

Taoba mapangtem nung election ajak nung kanga longsoa vote agütsüba constituencies nunga takümbo voters kanga ajema liasü.

2019 küm election nung Arunachal Pradesh East nung vote agütsüba shilem 87.03 liasü saka takümbo shilem 76.37 dang liasü. Yamaji Manipur nunga constituency anaprong nung voters ajema liasü (2019 küm shilem 82.69 aliba nungi takümbo shilem 70.63 dang liasü).

2019 küm Mizoram nung voters shilem 63.14-i vote agütsüba saka takümbo vote agütsür shilem 56.60 dang liasü.

Nagaland nungbo Eastern Nagaland People's Organisation (ENPO) kübok voters lakh 4 dak atemai election nung shilem magi, ibayongji 2019 küm

election nung vote agütsür shilem 83 liaka takümbo vote agütsür shilem 56.91 dang liasü.

Tamil Nadu aser Uttarakhand na nunga election mezüngbuba shilem nung agiba constituencies nung vote agütsür tajemba liasü. Tamil Nadu nung 2019 küm vote agütsür shilem 72.44 aliba nungi takümbo shilem 69.76 dang liasü aser Uttarakhand nunga taoba mapang shilem 59.21 aliba nungi takümbo shilem 54.81 dang liasü.

Iba dak alia Bihar nung constituency pezü, Madhya Pradesh nung trok, Uttar Pradesh nung ti, Rajasthan nung 12, West Bengal nung asem aser Uttarakhand nunga constituency ponguprongla nung taküm vote agütsür tajemba liasü.

Sarath Reddy ket nungi BJP-i sen crore 50 agizük: Sanjay Singh

New Delhi, April 20 (Agencies): Honibarnü AAP lenir aser Rajya Sabha MP Sanjay Singh-i, Delhi excise policy ken o nung tai tonglokja alir ka ket nungi BJP-i sen crore 50 agizük, ajisüaka Enforcement Directorate (ED)-i iba anemaji kecha meinyaker, ta aitsü.

New Delhi nung osangbenertem senden ka nung Singh-i, Delhi excise policy ken o dak sendakba nung kuli kecha makai Delhi Chief Minister Arvind Kejriwal, Manish Sisodia aser pa densema AAP lenirtem aika puogo, ta ashi.

Singh-i, excise policy ken o nung Reddy apuba sülen 2022 küm November 15 nü Reddy-i BJP nem sen crore 50 tenla agütsü, ta ashi.

"Reddy jail nung ita trok amongba sülen 2023 küm May 8 nü bail nung chiok. Anogo ishika tsüingda pai electoral bonds ajanga BJP nem sen

crore 50 agütsü," ta Singh-i metetdaksü.

"ED-i pa (Sarath Chandra Reddy) ya excise policy ochimashi ken o nung tetsüti ta shiogo. 2023 küm January 20 nü pai bail temepishiba agütsüba ken o angadanga mapang nung pai, ED-i pa kanga rongshir aser pa densema pa den inyakertem nem kuli kar nung sign sädaksütsü atema tashiyim amshir ta ashi. Paisa, Delhi sorkar ketdangsertem nem sübokrem crore 100 agütsü ta tai tonglokja alibaji tiyazü ta ashi," ta Singh-isa metetdaksü.

Singh-i, pa aputsü lia Reddy-i 2022 küm BJP nem sen crore 5 tenla agütsü, ta ashi.

Taküm March 21 nü electoral bonds osang yimjak nung sangdonga liasü, aser ibaji ajanga BJP-i Reddy ket nungi sen agibaji jungkai adok aser ED-i Delhi Chief Minister Arvind Kejriwal'er ki mita ao, ta Sanjay Singh-isa metetdaksü.

UP nung tepuokdak alir 180-i Class 10, 12 Board Exam nung takok angu

Lucknow, April 20 (Agencies): Uttar Pradesh kübok Ghaziabad, Agra aser Lucknow densema district 30 nung aliba jail nung puoka alir nisung 180-i Class 10 aser Class 12 board exam nung takok nguogo, ta ketdangsertemi metetdaksü.

Honibarnü Uttar Pradesh State Board of High School & Intermediate Education-i board exam agiba osang sangdonga liasü. Class 10 nung takok angurtem shilem 89.55 liasü aser Class 12 nung takok angurtem shilem 82.60 liasü.

Uttar Pradesh nung tepuokdak balala nung alir

nisung 91-i class 10 tatidang agütsüba nungi parnok 89-i takok angu aser jail nung alir 105-i class 12 tatidang agütsüba nungi parnok 87-i takok angu.

Ghaziabad district jail nungi nisung 29-i Class 12 board exams agütsü aser parnok 17-i takok angu. Iba denji kasa Bulandshahr district jail nungi nisung 11-i class 12 tatidang agütsüba nungi parnok nisung 10-i takok angu.

Hardoi district nungbo tepuokdak alir nisung pezüi board exams agütsü aser par pezüpronglai takok angu, ta ketdangsertemisa metetdaksü.

Punjab nung jail telung nung telok ana tsüingda raradang nisung 2 asü

Chandigarh, April 20 (Agencies): Hokolbar aonung Punjab kübok Sangrur nung aliba jail ka nung telok ana tsüingda rara adok; iba tatalokba nung nisung ana asü aser nisung ana kanga mejungi yiru, ta ketdangsertemi metetdaksü.

Punjab State Human Rights Commission (PSHRC)-i additional director general of police (ADGP), prisons, Arun Pal Singh dang iba tatalokba osang tejangja agüjang, ta tuyuogo.

Jail telung nung alirtem tsüingda rara adokba kuliji

police-i bushisüing dang tenzüko.

Osangbener den jembidang doctor kati, "District jail nungi nisung pezü hospital-i anir aru aser nisung pezü nungjagi anabo tasü bener aru. Kanga mejungi yirua alir ana maneni treatment agütsü atema Patiala-i yokogo," ta metetdaksü.

Doctor jagi, Harsh aser Dharmender na sür bener aru aser Gagandeep Singh o Mohd Sehwarz na mejungi yirua lir, ta metetdaksü.

Paisa, Singh aser Sehwarz na techira oset kar agi teberem,

tekolak, teka aser tenarong mejungi yiru, ta metetdaksü.

Osangbenertem den jembidang Punjab Police DGP, Harcharan Singh Bhular-i, anogo ishika tejaklen jail telung nung telok ana tsüingda mangatettep adoka liasü, ta metetdaksü.

Paisa, iba tatalokba dak sendakba nung nisung ter anema ken o benokogo, ta metetdaksü.

Tasüingdanga ka langzüdang Bhular-i, telok ana tsüingda raratepdangji kotari ana, merang pipe ka aser süng ka amshia liasü, ta metetdaksü.



April 20, 2024 nü Kadapa nung Andhra Pradesh Congress Tir, YS Sharmila-i Kadapa Lok Sabha menden nungi tokteptsü atema nomination file asütsü lia lai tebu aser taoba mapang Andhra Pradesh Chief Minister, asür YS Rajasekhara Reddy nem akhüm agütsüdang tangokba noksa nung angur.

Mahanadi ayong nung rong ka meküpa lendong nung nisung 7 asü

Bhubaneswar, April 20 (Agencies): Honibarnü Odisha state kübok Jharsuguda district nung Mahanadi ayong nung rong ka meküpa lendong nung nisung tenet asü.

Rong nungji nisung 50 shi mener liasü. Iba lendong atalokba sülen samaba nisungtem bushi tenzüka liasü.

Rong nung mena alirtemji Bargarh district kübok Bandhipali area-i aoba mapang ayong tomten tzüsem ajanga rongji meküpa.

Odisha Chief Minister

Naveen Patnaik-i mangyim jashi lemsatepba den külemi iba lendong nung asür kibongtem shia nem sen lakh pezüzü teyari agütsütsü, ta metetdaksü.

Yangji alir BJP lenir, Suresh Pujari-i, "Iba rongji licence tejangja maliasü. Ketdangsertemi iba rong temsüa aliba certificate magütsü aser rong nungji 'lifeguard'-a maliasü," ta metetdaksü.

Paisa, rong nungji nisung tali amenba ajanga lendong ajuru, ta metetdaksü.



April 20, 2024 nü Anantang district nung PDP Tir aser taoba mapang Jammu & Kashmir chief minister, Mehbooba Mufti-i Lok Sabha election nüboyim sentong ka nung shilem agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUMGNÜ, APRIL (RONGCHII) 21, 2024

Tsüngremashi angadaksünüba

Tsüngremi asenok shiruru ama liasüba tia nungi nüji kümdaktsü. Asenok chiyongtsüa maka timtema liasü saka asenok tebok sünga chiyongajema alitsüsa pai asenok moatsü. Asenok sensaker liasü Pai takar kümdaktsü, asenok shiranga liasü pai aneptsü aser asenok tangar kubok alar jenjang nung okrongseta liasüba jenjang nungi Pai asenok anitet. Atangji, Pai lendong timtem jenti nungi kümzüka asenok anitetba temeim aser taochi mapa ajak nungji Tsüngremer nükjidong aser Pai asenok nem inyakdaktsünüba sentongtem dena lir. Aji oda, item sentongtem meteta asenoki mapa kuma inyaktsübaji kanga tongtibang asütsü. Israel nungertem Egypt lima nung alarsa aliba tia nungi Tsüngremi anitet. Aji oda, Tsüngremi parnok anitetba nükjidongji Pai par tsüraburtem dang nangzükba lima nung janratema yimji-yimjung nung lidaktsütsü asoshi kija masü saka iba dang nung jagi tongtibangba Pa taginüba kar liasü. Anungji, Israel nung Egypt lima toktsür ita asembuba nung Pai Israel nungertem dang Pai parnok anitetba nükjidong nenshia metetdaktsü. Tsüngremi Sinai arem nung Mosa dang ashi, " Ni Ijip nung dang kechi inyak aser kechi koda ni mongzü tashikang manung bener kümzüka nenok kü dangi anir aru, aji nenoki nguogo. Anungji, tang nenoki kü dang angadi süra aser kü tezüngzükba benshidi süra, ajangla kin ajak madak nenok ni asoshi kü rongsen balaka asütsü." (Anitet 19:4-5). Tetezü, Israel nung alar tia nungi kümzükba nükjidongji Tsüngremi ashiba angadaksütsü asoshi liasü. Egypt lima nung aliba mapang Israel nungertem nem Parnok Tsüngrem mekülemdaktsü. Tsüngremi iba tiaji meteta dang liasü, anungji iba ama alar tia nungi nüji kümer külen pelashishia aser sademsadema Pa dang meimtsü aser Pa külemtsü asoshi Tsüngremi Israel nungertem anitet. Aji oda, Tsüngremi Israel nung kanga meimba agi, parnoki parnok anitetba nükjidong amadokalir ta ser ita asembuba nung Tsüngremi ano ken nenshia metetdaktsü südi. Israel nung amaji, asenoka makamait aser timtem tia nung anitetbaji Tsüngrem taochi agi moatsüba mapatem lir. Ajisüaka, asenoki aiben asen mapa nung dang temulung agütsür. Iba jagi asenok kanga mazünger aser Tsüngrem külemtsüa amadoker. Tsüngremi asenok kümzükba, aneptsüba aser anitetbaji asenok alima nung timmedemi janratema lidaktsütsü asoshi lir ta kisung asenoki angatetba agi, asenoki Tsüngrem nem tenüngsang agütsütsübo amaa adoker. Asenokbo Tsüngremi kümzük aser Pai moatsü ser nung asenoki Pa külemtsü mebileteter. Tsüngremi koda asenok moatsür yamaji Pai asenok Pai ashi angaa lidaktsüner. Tsüngrem tashi angaba nung ali rongsen ajak keta lir. Pai ashir, " ali ajak kü meyong lir." (Anitet : 19:5b). Atangji, asenok taküm nung timtem toudi aser shisabolu ajuruba mesüra Pai asenok moatsüba ajanga Tsüngremi asenok nem asenok tashi, temulung aser tanüla ajak agi Paji dang tsüngremtem madak Tsüngrem aser kiburtem madak Kibur ta angateta külemdaktsüner. Kodangsa, asenok mapa inyak junga kümdir, mesüra kodangsa asenok mapa inyaktsüsa maongka ngudir mesüra kodangsa asenok taküm aser kibong Tsüngremi anitetba aser moatsüba ajanga mapa inyakaa janratema alitsü tenzükdir, Tsüngremi asenok nem maotsübaji asenok janratema alitsü atema kija masü saka tongtibangbajibo Pai asenok Pa den teti longjema lidaktsünüba agi moatsü ta angatetdi. Tsüngremi asenok nem Pai ashi angadaksünüba agi tashi manga dang merenshir aser tashi angadang moatsür. Aji oda, asenok taküm nung ajuruba tensa tia ajak nung Tsüngremi asenok Pa anasa, Pa den Pai ashi angaa lidaktsüner ta bilemtetdi. Israel nung Egypt lima alar tia nungi aniteter ita asembuba nung nenshiba ama, tanü Tsüngremi asenok danga Pai asenok moatsüba, aneptsüba aser takok agütsüba nükjidong to tamadok ta nenshir.

OLEMSABANG KHRISTANPUR ANÜNGER

I. Temjen Jamir Retd. Addl. Sp Mkg

Akhidang Tanzanian president Julius K. Nyerere ajanga ashir, kodang lokti aser iba putu arakzüdir temaba yimden sepay telok aser iba putu yimyatemi süngjemdaktsütsü tamakoktsü asütsü. Alima otsü nung temelenshi adokdaktsüba indang bushira Nyerere otem jembiba dang masü saka shisadangtsü tim. Asen tendak alima putu otsü nung Cuban nungertem Fidel Castro aser Che Guevara tenati anir arakzü aser tatembangba tashi (Clutches of Imperialism) makok; teraksa ochi mashi anema tepetzük China nung apuso aser temaba tashitemi makok.

Nicaragua sensoi united state anema longjemer nokdak aser pei asoshi nüjiso bener aru. Iranian nungertemi arakzüa yipru atokdaktsü aser alima nung tashi tulutiba America-i menokdangtet. Itemji mesüka India nung Mahatma Gandhi-i anir azü metokshiba inyakyimtem amshia British nung talenbangbaren nungi nüjiso angu.

Item linük mesüka tanü asen lima nung Naga nüburtem arakzüdi asür, kechiyong asenoki 'melenshiner', iba ojang ya ajak mulungjang telongtiba nungi adoka ashir. Naga lima yimden loktilibaren yimsüsüdak ajunga nung teraksa agi süngatokogo. Aseni bushidangra Naga lima nung yimsüsür dang masü saka nüburtem aser arogo teraksa tia nung yia lir.

Yimdenrü aser loktilibarü bushira

(A) Takoktet nübu Emile Durkheim aser Mox Weber nati ashir, kodang yimdenrü makmakshimak lidir idangji nüburtem teimla ka meli-isa akümer aser nisung taliba yimya o alima na meputeper. Lenir kari ashir "Ni Naga nübur meimer" saka mapa agi mesayur mesüra pei kinunger atema dang bilemer. Iba jagi alima majunger ta Thomas Merton-i ashir. Paisa ashir, Lokti nung nisung nükjidong mekai pilaa odaktsür. Tatishitsü agi 'Mozü lar' aser mangmangdaktsüba ajemertem (alcoholism) itemi nisungi mulungba tsütsü nungi adokba dang masü saka yimdenrü tashi maitba nungi adokba lir.

Thomas Merton-i ashir, Lokti aser yimden anemertem aser mepetmesü, telok kümtetter rakzükrademba, tetezü makai tashi maiter timtemdaktsüba, ozüng pei teka nung amertem, item yagi ozüngi kecha mesütettsüji ta ser ngangsanagtemer ta paisa ashir.

(B) Temelemshish adokdaktsütsü tepdang

Crane Brinton aser James Davies nati ashir, temelenshi adokdaktsübayim indang bushia arunung itemi bushitet – Itemi lira temelenshi adoktsü lenmang ana nung lir;

1. Temelenshi bener arutsü asoshi kodang nokdakdir aser lokti nung yimdenrü nungi yimli saku amshia mangur, kodang temelenshi asoshi yimsüsür aser yimden leniri magizükli idangji temelenshi arutsü ana nung lir.
2. Rongsen aser tashi na kodang sakuku sa melemsadir, idangji temelenshi adoktsü ana nung lir.
3. Tang alir yimsüsüsba yimden dak alaka lokti-i tanga lenmang lir ta amangtsüla, aser taoba dang nungi tarutsü yimsüsür shimtsü parnok dak tashi lir ta amangdi.
4. Tenteta aliba yimsüsür tashi mait tatong mazü, telemsa chitepa raraba aser azüng nung lemtet maka aser pei sasa pei dak temulung melemteter idangji nübur anünger aser asüktemer. Idangji temelenshi adoktsü ana nung lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung Khristan putir tambutisang, Melito Dias süogo



Melito Dias

Karachi April 20, 2024 (Agencies): Pakistan nung Khristan putirtem rongnung tambutisang, Melito Dias alima nungi pilaogo; pa arrshi küm 97 liasü.

Pakistan nung Khristantemi dang masü saka Muslim nungertemia pa nem akhüm agütsür.

April 19 nü pa Karachi nung aliba Holy Family Hospital nung monga lia süogo, ta Pakistani Catholic bishops' National Commission for Justice and Peace (NCJP)-i metetdaksü.

Dias ya 1921 küm February 27 nü Sindh province yimtiba, Karachi nung aso aser Arogoi lapokba St. Patrick's High School nung azüing. 1954 küm August 24 nü Karachi Catholic Archdiocese-i temelaba agüja Sri Lanka kübok Kandy yimti

nung pa putir 'ordain' asü.

Pa mezüing Balochistan province kübok Quetta nung aliba Minor Seminary nung inyakba sülen pa azüingba school- St. Patrick's High School nung inyak aser Sindh province kübok Larkana yimti nung aliba St. Joseph Arogo nung inyak.

Dias-i jangraba ama missionary inyaktsü atema pa Sri Lanka-i ao. Pakistan-i tanaben meyipa aruba sülen pai Arogoi lapokba school aika nung inyak.

Karachi & Balochistan nung Anglican putir, Rev. Salman Babar-i, "Pa ya temeim tulu aketba nisung ka liasü. Talisa pai Khristan tanurtem nem shisaliok tajung agütsütsü atema kanga nendaka inyak. Shisaliok dak sendakba nung onoki timtem balala ajangshiba mapang ajak

nung pai onok yaria liasü," ta metetdaksü.

Rev. Salan-isa, pa asüba ya linük nung Khristantem atema takoksa tulu, ta ashi.

Pakistan nung Islamic tentet tulutiba, Pakistan Ulema Council nung chairman, Dr. Tahir Ashrafi-i, "Pai nüburtem junga tenzükba atema nüburtemi pa küm aika bilemtetsü," ta ashi.

NCJP kübok Karachi diocesan coordinator, Kashif Anthony-i, "Dias ya ajungmesor tajung ka liasü. Putir Melito Dias ya medemer tajung ka liasü. Pa den minute ishika danga külemi mener sensaksemba ajanga-a temelungjang nung tesünep ngua liasü," ta ashi.

April 20 nü Karachi nung aliba St. Patrick Tenla kidang Dias den tatembangbuba asüpila sentong agiogo.

Grammy award angur osang-tajung kentener, Mandisa süogo



Mandisa

April 20, 2024: Khrista osangtajung kentener aser taoba mapang 'American Idol' nung tokteper, Mandisa alima nungi pilaogo; la arrshi küm 47 dang liasü.

Hokolbarnü Christian radio station K-LOVE-i, Grammy Award angur aser 2006 küm American Idol season five nung shilem agir, Mandisa Brihostibarnü Nashville, Tennessee nung lar kidang lia alima nungi pilaogo, ta metetdaksü.

"American Idol" nung lai top 10 jenjang tongteta liasü iba sülen lai kensep pongu sayaba den külemi TobyMac, Michael W. Smith, Matthew West aser Kirk Franklin nung ama osangtajung kentenertem dena külemi kentena liasü.

K-LOVE nung Media Officer tongti, David Pierce-i, "Mandisa-i Yisu meima liasü aser lai Yisu kuli asütsü atema sabang amshi," ta metetdaksü.

Pierce-isa, "Tang la Tsüngrem den lir. Asenokbo

jashir saka Mandisa bo Kibuba kidang lir. Onoki Mandisa'er kibong aser lar medemertertem atema sarasademtsür, aser nenok danga sarasadem nung lar kibong bilemtetsü mepishir," ta metetdaksü.

Mandisa kechi kuli agi asüar tang tashi nungbo mejangja.

2022 küm Mandisa-i lai züluba kaket 'Out of the Dark: My Journey Through The Shadows To Find God's Joy' sayaa liasü.

La California nung inetba sülen Nashville nung aliba Fisk University nung azüing aser kanga nungtugu Fisk University Jubilee singers nunga züingsem ka liasü. 2000 küm ka Fisk University nung graduate asü.

2005 küm lai Chicago nung "American Idol" atema audition nung shilem agi aser American Idol nung jenjang 9buba tashi tongteta liasü.

2007 küm July ita nung lai mezüingbuba kensep "True Beauty" saya aser iba kenseppi ajanga Top Christian Album charts tongteta liasü.

2014 küm 56buba Grammy Awards nung la indang "Overcomer" kensep ajanga Best Contemporary Christian Music Album award ngua liasü.

ANOGO ABEN TSÜNGREM DEN

TSÜNGREM TAOCHI AMAJOK TEKÜMDAKTSÜ

"Ni Tsüngrem taochi amajok mekümdaktsür, kechiyong ozüing ajanga nisung kaji Tsüngrem tsüngdang temeshi kümra, aji agi Khrista amajok nung asü ta sayur. ~ Galatia 2:21

Tanü asen putu nung nisunger shisatsü sangrasangi Teprangdangra jembiba o aser inyakba mapatem jag obendangdak obendangertem dena mangmangdaksür Kechiyong alima nung nisungi pei temetenji ajak dang temaba ta züingshi nung meshitak, tai ta metetakas aibelenertem metentsür, iba jagi nisungi Tsüngren metsübuba sayur.

Nisung aikati taküm ya pei sasa alir ama bilemer saka tatem nungbo pei dang akoksar. Alima ya asüingbo tempangatoktsü ama bilema pei inyaknüba mapa ajak tenük amor inyaker aser jembir.

Temeim adianutem, temenenpur ajunga Tsüngrem tsüngdang alima ozüing ajanga metentsüra asenoki Tsüngrem temeshibaji kong toktsür? Tsüngrem taochij koba jenjang nung asenoki züingshitsü?

Tenyar Pauli "Ni Tsüngrem taochi amajok mekümdaktsür," ta ashibaji ni Tsüngrem matsüngdang aibelen masür ta ashiba lir. Kechiyong pai Yisu kangki nung asübaji pa menen yong asü aser iba taochi nungji pa kümzük ta pai angatet. Yisu kangki nung pa asoshi asübaji tepang ag rasa-a ashitsü makokba jenjang tulu ta pai züingshi.

RI-i India nung anti conversion ozüingtem agientsü mepishir

April 20, 2024: Tang India nung General elections agiba mapang nung UK nung amenoka aliba Khristan ministry, Release International (RI)-i asentenshir India nung anti-conversion ozüingtem agientsü atema takhangba agütsüogo.

Release International-i, anti conversion ozüing ajanga India nung Khristantem aika puogo aser tamangertem anema inyakba kanga bulua kümogo, ta metetdaksü.

India nung hopta trok jungnüa Lok Sabha election agidang nisung billion ka jungnüai vote agütsütsü. Alima nung democracy linük tulutiba süaka India nung Khristantem aser Muslim nung densema minorities anema inyakba agi aikati tebilemtsü katsür.

Release International CEO, Paul Robinson-i, "2014 küm BJP-i sorkar akümba sülen Khristantem magizüktetba kanga bulua akümba onoki nguogo," ta ashi.

Paul Robinson-isa, "India nung onok partners-i onok dang, right wing Hindu züingsemtemi pastor tem dak azükba, Tenla kitem amakba aser sarasadem sentong tagidak mapang nung timtem agütsüba osangtem metetdaksüogo. Iba denji külemi state aika nung anti-conversion ozüingtem agizükba ajanga Khristantemi Hindu nungertem den pei yimsü indang melemsatepteter," ta metetdaksü.

Evangelical Fellowship of India (EFI)-i 2023 küm India nung Khristantem anema inyakba tatalokba 601 liasü, ta metetdaksüogo.

United Christian Forum (UCF)-ia 2024 küm tenzükter March ita tomten tashi nung India nung Khristantem anema inyakba tatalokba 160 lir, ta metetdaksüogo.

"Onoki India dang tesempa prokba nokdangtsü aser anti-conversion ozüingtem agientsü mepishir. Item ozüingtem ya India temzüing alema lir, kechiyong India temzüing ajanga pei yimsü tangar den lemsateptsü densema yimsü temeden balala agütsür," ta Robinson-i ashi.

Tawa Release International nungi team kati India semdanga osang tejangja bendena liasü. Parnoki India nung Hindu yimsü alia amangertemi azükba, apuba mesüra reshikangshiba pastor tem ajurua sensaksemogo.

India nung anti conversion ozüing kübok pastor ka dak azükba sülen police-ia senchi chia liasü. Release International team den jembidang pastor jagi, "Nü asütsüsa tensa ajuruaka ni Kibuba maneni tenzüktsü aser iba yim dak Kibubai tenyaba wadang ni inyaker," ta lemsatepa liasü.

Robinson-isa, "India nung election agiba mapang nung onoki India dang Khristantem anema inyakba anentsü aser anti-conversion ozüingtem agientsü mepishir," ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Süngden

(n) osettsüset, süoshi aser chiyongsü ayutsü atema süngbak agi yangluba oset (wooden box)

* Ozü yimtak Arogo nunger oset ayudak süngden tuluka lir.

Süngditsüben

(n) asanguri pei meimla dang ajaba (romantic address to a girl friend)

* Narolabo süngditsüben ama topur tajung liasü.

OLONG PAITEP # 6763

Grid for OLONG PAITEP # 6763 with numbers 1-15 and shaded cells.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6762 TELANGZÜBA

TIPIEN :

- 4. Temola, 6. Awa, 8. Yiar,
11. Moapu, 12. Tensa, 15. Auyi,
16. Aok, 18. Tzürar.

LANGTSÜNGLEN :

- 1. Ati, 2. Ilara, 3. Awatsüng,
5. Miim, 6. Aluru, 7. Süngjang,
9. Aousu, 10. Kotak, 13. Natzü,
14. Ayar, 17. Aru.

NAI-A YA METETTER MA

RÜJEB NUNG MAPANG TALANGTIBA KAZÜBA



Poland nunger Lukasz Szpunar (53)-i rüjeb pongdang ka nung mapang talangtiba kazütetba otsü tasen ka yanglutetogo. Lukasz-i rüjeb nung ghonda 4 ser minute 2 kazütet. Iba otsü yanglutsü atema pa tekolak aser tekong dak alaka tanüngba temang ajunga rüjeb nung rembanga liasü.

Manipur nung BJP aser Congress naprongi amakba aitsür

Imphal, April 20, 2024 (Agencies): 18 buba Lok Sabha election polling anogo nung ozüing alema inyaksangshiba aitsür ta BJP Manipur Pradesh-i metetdaksüogo.

Iba tatalokba aitsür aser aibelenertem merenshitsuila ta BJP Manipur Pradesh president A Sarda-i ashi.

BJP agents amakba ya khukhua aitsür aser iba ya tang tasen atalokba masü. Tesüiba elections nunga atalokogo aser Parliamentary elections mapang nisung kar injang agi yirua liasü, ta Sarda-i ashi.

"Onoki ECI tsüngdang ken o benokogo. Osang angashiba agi ozü BJP züngsem kar apu aser kar amokmeren" ta lai ashi.

Congress candidate Angomcha Bimol Akoijam-ia par party polling agents dak teka sangshiba aser amokmerenba

aitsüogo. Polling maparen nung mepetmesü adokdaksüba aser tsübudaksüba atema sasa bilemer. Iba inyakyim ajanga electoral maparen aser democratic tangatetba nung timtem agütsüogo ta Akoijam-ashi.

"Ozü polling agents amakba aser amokmerenba ya kijatem dak kongshiba masü saka democracy tamendakdak nung kongshiba lir" ta paisa ashi.

Indian National Developmental Inclusive Alliance (INDIA) Manipur unit-ia inner aser outer parliamentary constituency tem nung polling stations aika nung ozüing alema inyaksangshiba aitsüogo.

Congress party-i Inner Manipur constituency nung polling stations ajak aser Outer Manipur constituency nung

polling station kar nung re-polling asütsü takhangba agütsü.

Outer Manipur kübok tanüngba tesemtem nung April 26 nü polling asütsü.

"Onoki Election Commission of India, Chief Electoral Officer Manipur aser bangdak presiding officers tsüngdang ken o tem benokogo" ta Manipur Congress president Keisham Meghachandra Singh-i ashi.

"Onoki Inner Manipur nung polling stations 36 aser Outer Manipur nung 11 nung repolling asütsü takhangba agütsüogo" ta pai ashi.

Meghachandra ya Wangkhem assembly menden nungi MLA lir aser pai ashiba agi "polling stations telung nung agents mementet aser Congress party puemertemi polling station aika nung vote meinokstüet."

Sikkim Legislative Assembly aser Lok Sabha elections tiptema agiogo

Gangtok, April 20, 2024 (Agencies): April 19, 2024 nü Sikkim nung assembly elections den külemi Lok Sabha election agiogo.

Polling Stations 573 nung Assembly Constituency 32 atema polling kanga tiptema agiogo.

Polling Stations nung anepdang 5:30 ako nungi mock poll procedure tenzük aser anepdang 7:00 ako nungi actual poll tenzüka liasü.

Polling Station kar nungbo vote enoktsüba maparen meilungi dang agi aser nikongdang 5:00 ako tashi nung

ang tembang.

Yashi nikongdang 5:00 ako tashi nung Polling Station-i arur ajak nem vote enokdaksü. Sikkim nung Total Voter Turnout ji 79.90% liasü.

Iba nung Postal Ballots bendenlokba ajanga 4% talila akümsü akok.

Election Observers aser Candidates Representatives lia EVMs aser Election Papers ajak shibanger Strong Rooms nung yuogo.

EVMs ayuba Strong Rooms ya Central Armed Police Force

ajanga anüker aser iba dak alia 24x7 CCTV coverage lir.

Election Commission of India-i mapa lemzüksüba Returning Officers aser General Observers ajanga Honibarnü election papers ajak reprangdangogo aser Polling Stations nung mapa inyakba jnung temlung süa ka nung danga Re-poll asütsü onük maliasü.

Sikkim Legislative Assembly election atema June 2 nü aser Lok Sabha election atema June 4 nü votes azüngtsü.

Arunachal Pradesh polling station 4 nung re-polling asütsü

Itanagar, April 20, 2024 (Agencies): Arunachal Pradesh nung polling stations 4 nung ozüing alema mapa inyaksangshiba atema re-polling asütsü tetuyuba agütsüogo.

Arunachal nung re-poll asütsüba polling stations 4 ji ka Kurung Kumey nung aser asem Upper Siang district nung

lir ta Arunachal Pradesh chief electoral officer (CEO) Pawan Kumar Sain-i ashi.

Kurung Kumey district nung Nyapin assembly constituency kübok Langte Loth nung re-polling asütsü. Maneni, Upper Subansiri district nung Nacho assembly constituency kübok Bogia-Siyum, Dingser aser Lengi nung re-polling asütsü ta

CEO Sain-i ashi.

Polling station pezüprong nung electronic voting machine (EVM) raksatsütsü merang, ta pai ashi.

"Onoki EVMs raksatsütsü meranger aser teka ayirtem maitüsü jangjatsüogo. Parnok dak tapet mapa inyakogo" ta Arunachal Pradesh CEO-isa ashi.

Assam HSLC 2024 tatidang nung Anurag Doloi-i tematiba takok angu

Guwahati, April 20, 2024 (Agencies): Board of Secondary Education, Assam (SEBA)-i ketdangsüa agiba high school leaving certificate (HSLC) nung Jorhat district nungi Anurag Doloi-i tematiba menden takok nguogo.

Anurag Doloi ya Pragya Academy Senior Secondary School nung azünger. Pai Assam HSLC exam 2024 nung total marks 600 nungi 593 nguteta liasü.

Külen, at Biswanath Chariali nung Shankardev Shidhu Vidya Niketan kaketshir Jharna Saikia-i tanabuba jenjang takok angu. Lai 590 marks angu.

Board of Secondary Education Assam (SEBA)-i April 20 nü high school leaving certificate (HSLC) exams



indang results metetdakja liasü.

Kaketshir lakh 4,19,078-i Assam HSLC exam agütsüba nungi parnok 75.7% ajanga takok nguogo.

Assam kübok takok

tajungtiba anguba district ji Chirang lir. Iba district nung takok angurji 91.2% lir.

SEBA-i taküm February 16 nungi March 4 tashi Assam HSLC exams 2024 agia liasü.

Niger nungi sepaitem anintsü US mulunga agizükogo



Washington, Rongchii/April 20 (Agencies): Anüolen aliba linük den tesendaktep aliba nungi atsüingina Russia den tesendaktep yanglushiba mapang United States-i Niger nungi sepaitem anintsü.

US Department of State-i, Niger nung US department 1,000 amenoka aliba anintsü atema mulunga agizükogo. Niger ya 2023 küm July ita nungi military-i yimsüsüa arudar, ta US media-i Hokolbarnü metetdaksü.

US Deputy Secretary of State Kurt Campbell aser Nigeria Ato Kilonser Ali Mahaman Lamine Zeine na Hokolbarnü ajurutepogo, ta osang ajanga ashiba den Niger nungi sepaitem anintsü atema sentong tapet yanglutsü atema Washington bendanga agütsür lir ta shisem.

Sahel region nung al-Qaeda aser ISIL (ISIS) den sendaktepa

aliba teloktem den raratsü asoshi US-i Niger nung military base ka amenoka liasü.

Linük yimtiba Niamey nungi kilometer 920 shi pilar Agadez nung amenoka aliba tongtibang airbase ka surveillance flight tem aser tanga operation balala atema amshia liasü.

Air Base 201 ta nungja agütsür iba airbase ya USD million 100 dak tema intoka yanglu. 2018 küm nungi iba airbase ya ISIL kiralongrar aser al-Qaeda den sendaka aliba Jama'at Nusrat al-Islam wal Muslimeen (JNIM), telok amaksü atema amshia aruogo.

Niger nung military sorkar den sendaktepa US military-i, sepaitem anintsü atema renemshi tenzükogo aser taoba küm US General James Hecker-i, parnok indang drone tem amendaka ayutsü atema Africa anüolen tesem kar

asadangdar, ta metetdaksü.

Nigeria state television sangdong ka ajanga ashiba agi, US ketdangsürtemi taruba hopta semdangtsü. Sepaitem anintsüba indang State Department-i nüburttem nem kecha osang agüja mali aser ketdangsürtemi ashiba agi sepaitem anintsü asoshi mapang ka atakzuka mali.

Niger-i March ita sangdong ka ajanga US aser military dak sendakba nung tenangzüktepa yanglur aliba nungi atsüinginogo aser US sepaitem anintsü asoshi jenjang agitsü ta ashi.

Niger nung military aser nüburttemi memulungi akümba sülen US nunger sepaitem Niger nungi atsüingitsüa kümogo. US nunger sepaitem linük toktsür odaktsütsü khanga nüburttemi iba ita tetenzüklen linük yimtiba nung longkak aita liasü.

Kidanger Mali aser Burkina Faso nung military yimsüsürtem ama Niger nungi military-i sorkar atsüingba sülen France aser Europe nungi sepaitem mintokogo.

Linük asemprongla ya tang Russia den tesendaktep yanglushiba mapang ka lir aser Moscow-i iba ita tetenzüklen Niger-i military trainer tem, air defence system ka aser tanga military hadirtem yokogo.

'Kechiaser ni asoshi taküm alibaji Khrista aser tasütsüji tajangzük lir,' Filipi 1:21



(February 13, 1927 - April 14, 2024)

Mulungnen O

Onok Asür J. **IMKONG AMRI**'er kinungertemi tsürapur iba lima nugi pila aoba mapang kija aser lokti kwinkatisa sarasadem, nübu, rongsen, tesunep o, sarasadem aser tsüngdong arua onok nem teyari agütsüogo nenok ajak dang kanga pelar.

Nenok ajak dang mejeta tepela melemsatetba atema kanga sasaseta bilemer, ajisüaka onoki teküboklen agüja aliba kija aser lokti kar dang kanga pelaba lemsateper.

1. Shri Temjenmenba & family, MLA & Advisor, Transport & Technical Education, Govt. of Nagaland
2. Shri Tongpang Ozüküm & family, MLA & Advisor, Water Resources, Govt. of Nagaland
3. Shri & Smt. I. Imkong & Family (Ex-Minister)
4. Shri & Smt. Takuyaba (Ex-MLA)
5. Alempang Baptist Arogo (ABA)
6. Kohima Ao Baptist Arogo (KABA)
7. Baptist Church Changki & Baptist Church Changki, Women Department
8. Changki Yimlang Baptist Arogo (CYBA) & CYBA Arogochir Dimapur
9. Merayim Baptist Arogo & Merayim Baptist Arogotsür, Merayim
10. Nokon Baptist Arogo, Longnak
11. Chungliyimsen Baptist (Tsungli) Arogo
12. Changki Fellowship Mokokchung
13. Alempang Ward Yimden, Mokokchung
14. Changki Senso Telongjem Mokokchung
15. Pensioner's Association, Mokokchung
16. Kohima Ao Officertem Telongjem (KAOT)
17. Amri Phaja Mokokchung and Amri Phaja Changki
18. Aolepden Jaso Telongjem and Aolepden Semchisemnur Tetzürtem Telongjem, Changki
19. Industry Area Youth Association (IAYA), Mkg
20. Osanglong Adhoc Committee, Mokokchung

Nenok mapa tajung asoshi tajungsang Tsüngremi nenok ajak talobusa moajang ta ozü sarasadem. Onoki Tsüngrem nem konang tetushi ajaka agütsür.

-Temeim kinungtsü, jala jabsotem, anükapang, semchirtem, tanabuba semchirtem aser kinungertem ajak.

North Korea-i 'warhead' tasen ka tendangogo



Honibarnü North Korea sorkari lemsatepba noksa ka nung "Hwasal-1 Ra-3 strategic cruise missile" ta nungja agütsür missile ka transporter erector launcher vehicle nungi yokba noksa nung angur.

Pyongyang, Rongchii/April 20 (Agencies): North Korea-i strategic cruise missile ka atema "super-large warhead" ka tendangogo, ta state media sangdong ka ajanga metetdaksü. North-isa anti-aircraft missile tapu balaka tendangogo, ta kasa sangdong ajanga metetdaksü.

"DPRK Missile Administration-i, strategic cruise missile Hwasal-1 Ra-3' atema design süa yangluba warhead tulu ka indang tashi tendangogo, ta KCNA news agency-i Honibarnü sangdong ka ajanga metetdaksü.

North Korea-isa, Hokolbarnü "Pyoljji-1-2" ka tendangogo, koba state media-i ashiba agi, anti-aircraft missile tapu balaka lir.

KCNA-isa, item hadirtem tendangba sülen nükjidong kar

tongtetogo, ta ashi saka iba dak alaka osang talila magütsü.

Hadir balala tendangba ya administration aser parnok den sendaka aliba defence science institutes inyakyim ka lir," ta KCNA-i ashi.

Iba tetendangba ya linük temeket nung tensa dak kecha sendaka mali, ta KCNA-i ashi saka osang tejangja magütsü.

April tetenzüklen North Korea-i, parnoki medium-to-long-range solid-fuel hypersonic missile tasen ka tendangogo, ta ashi aser Kim Jong Un-i repranga lia iba missile tendangba video ka lemsatepa liasü.

North Korea-i tawa cruise missile tem tapu balala aika yanglu arudar aser iba ajanga North indang intercontinental variants densema ballistic missile tem nem teyari

agütsütsü.

Ken o asadangertemi ashiba agi, Russia den military tesendaktep akangshiba ajanga anti-aircraft missile technology dak sendakba nung North Korea kanga ajangzüktsü akok, kechiyong linük ana tawa military dak sendakba nung tensekdaktep yanglushia arudar.

Ukraine den rara nung amshitsü atema Russia nem artillery shell aser tanga hadirtem agütsüba atema US aser South Korea nati North aitsüogo.

2009 küm nuclear tanabuba tendangba sülen Pyongyang nem linüktemi tenokdangba balala agütsür lir, saka parnok indang nuclear aser weapons programme tem kecha tenokdangba makai renloka odar.

Thai-Myanmar arrtsü nung sepaitem aser telungpurtem khatap

Bangkok, Rongchii/April 20 (Agencies): Myanmar aser Thailand na arrtsü nung Myanmar military aser telungpurtem khatap, ta Thailand sorkar aser media sangdong balala ajanga metetdaksü.

Thai aser Myanmar arrtsü nung alirtemi ashiba agi, parnoki tongtibang apu ka anasa bomb apokba aser machine-gun tulutem akhaba ola Hokolbar aonung nungi tenzuka Honibar anepang tashi angashia liasü.

Karen National Union (KNU) sepaitemi taoba hopta iba arrtsü nung aliba jila aser temeket nung Myanmar army indang outpost tem atsünga liasü. Iba jila ya Myanmar aser Thailand na arrtsü nung lir aser linük ana ya apu ana agi sendaktepa lir.

Honibar anepdang Karen telungpur teloktemi Thai-Myanmar Friendship apu tanabuba ana atsüka aliba Myanmar nunger sepaitem amak tenzükba sülen telok ana tsüngda khatapa liasü, ta Thailand kübok Mae Sot district police tekolakba Pittayakorn Phetcharai-i ashi. Iba apu ya linük ana tsüngda shishilembatsü atema tongtibang apu ka lir.

Paisa, nisung 1,300 shi Thailand-i jenaogo ta ashi.

Pittayakorn-i ashiba agi, prangbong hadir balala atema arrtsü adena aoertem local

ketdangsürtemi bushidar.

"Onoki parnok nem chiyongtsü agütsüogo aser tekümzükba tesem bushia anirogo," ta pai shisem.

Thai broadcaster NBT-i X nung post ka ajanga ashiba agi, telungpurtemi 40mm machine guns amshi aser drone tem amshia bomb 20 tsükdaktsü. Myanmar military sepa 200 shi ya telungpurtemi April 5 nü nungi tenzuka Myawaddy jila amakba sülen atsüinginer liasü.

Honibar anepdang arrtsü nung aliba Thai army unit kati ashiba agi, telungpurtemi apu kübok atsüker aliba sepaitem maka liasü.

Thai Ato Kilonser Srettha Thavisin-i ashiba agi, pai tensa kanga kümdanga asadangdar aser par linüki nungdak dang süra humanitarian teyari agütsütsü renema lir.

"Raratepba ajanga Thailand dak mekonshitsü imlar aser linük arrtsü aser nüburttem kümzuka toktsütsü atema onok renema lir," ta pai X ajanga metetdaksü.

Myanmar military-i 2021 küm Feruary ita Aung San Suu Kyi-i aniba sorkar atsüngtokba sülen linük nung mepetmesü tulu adoker lir aser shishilembaba jila Myawaddy telungpurtem nem atsüngdaktsüba sülen parnok kanga akoksaogo.

Stuttgart Open: Swiatek semi-i iogo; Sabalenka & Gauff na tsükogo



Iga Swiatek

Rongchii/April 20, 2024

(Agencies): World number one aser defending champion Iga Swiatek-i Hokolbarnü Stuttgart Open quarter final nung Emma Raducanu koka iba asayamung nung asaya 10buba khen danga tamakok mongui asayaogo.

Ajisüaka mimlai lia Aryna Sabalenka aser Coco Gauff nabo tsükogo.

Top seed Swiatek, shibai 2022 aser 2023 küm iba asayamung koker lir lai quarter final nung taoba mapang US Open champion Raducanu 7-6 (7/2), 6-3 agi koka liasü.

Wimbledon tesüsabuba koker alila Marketa

Vondrousova-i world number 2 asayar aser Stuttgart nung asemben tashi tanabuba jenjang nung tembangba asayar Sabalenka 3-6, 6-3, 7-5 agi koka liasü.

US Open champion aser world number 3 asayar Gauff-a 3-6, 6-4, 7-6 (8/6) agi Ukraine tsür Marta Kostyuk-i tsükdaksüogo.

Arishi küm 22 tain Swiatek-i ghonda ana ser minute ishika nung dang Raducanu koka liasü, shiba 2022 küm sülen tang mezüngbuba quarter-final ka nung asaya liasü.

Iba asaya mekokaka Raducanu tawa tajungba asaya

arudar. Lai taoba hopta Billie Jean King Cup nung France den asayaba mapang asaya ana ako aser Stuttgart nunga quarter tonga asayaogo, koba 2021 küm US Open akokba sülen tang mezüngbuba lai asaya pezü atonga akokba asütsü.

Taoba mapang world number 10 asayar ya Stuttgart nung asayai aruba mapang jenjang 303 nung liasü. Ita terana tejakdang la 2023 küm atema tatembangsa Stuttgart nung asaya aser iba sülen la tekanük anaprongla aser tetsüng teloktep surgery agia liasü.

Semifinal nung Swiatek fourth-seeded asayar Elena Rybakina den asayatsü, shibai Jasmine Paolini 6-3, 5-7, 6-3 agi koka liasü.

Taoba küm July ita Wimbledon final nung Sabalenka akokba sülen Vondrousova tang mezüngbuba asayamung ka nung semifinal tongogo.

Vondrousova semifinal nung Kostyuk den asayatsü, shibai Gauff koka Australia Open nung tamakok anguba küpzükogo.

IPL: Pollard aser David na dang senchi achi



Rongchii/April 20, 2024

(Agencies): April 18 nung Mullanpur nung Punjab Kings den asayaba mapang IPL indang Code of Conduct nung aibelenba atema Mumbai Indians nungi asayar Tim David aser batting coach Kieron Pollard na dang tena indang match fee shilem 20 senchi chiogo.

Asaya indang video ka prokshiba sülen tena nem iba temerenshi agüja liasü. Video nung iba asayamung ponguben tashi koker aliba team dugout nungi asayar aser support staff-i review agitsü atema batter Suryakumar Yadav nem teyari agütsüba sayua liasü.

"David aser Pollard nati IPL indang Code of Conduct kübok Level 1 offence menaogo. David aser Pollard naprongla dang tena indang match fees shilem 20 senchi chiogo," ta IPL sangdong ka ajanga Honibarnü

metetdaksü.

"Tenapronglai aibelenba nangzükogo aser match referee-i temerenshi agütsüba agizükogo. Code of Conduct kübok Level 1 aibelen atema match referee telemteba kechi agütsüdir aji tatembangbuba lir," ta kasa sangdong ajanga metetdaksü.

Mumbai Indians' pur batting amenba mapang over 15buba nung Arshdeep Singh-i aonba ball ka off-stump adener line ajanga ao. Iba mapang Suryakumar-i run 67 yanglur liasü aser pai ball azütsü merangdanga liasü, saka on-field umpire-i ball shitak onogo, ta ashi.

Ajisüaka television camera temi MI head coach Mark Boucher-i Suryakumar dang iba ball ya wide-a sayuba apu. Iba sülen David aser Pollard nati asayar dang review agitsü ajungshi, koba temzüng ozüing alema lir.

Phogat-i tetsür 50kg Paris Olympics quota nguogo



Vinesh Phogat

Rongchii/April 20, 2024

(Agencies): Asian Olympic Qualifier nung honibarnü Vinesh Phogat-i tetsür 50kg category final tongtetba sülen India asoshi Paris Olympics atema quota ka ngutetogo.

Taoba küm World Championships nung bronze medal anguba sülen Antim Panghal-ia 53kg category nung Paris Games atema quota ka nguteter liasü.

Arishi küm 29 tain Vinesh-i tang agi tasembenbuba atonga Olympic quota ngutetogo. La Rio Games (2016) aser Tokyo (2020) Olympics nunga asayaogo.

Vinesh shiba WFI tekolakba Brij Bhushan Sharan Singh anema nokdaker rongnung ka liasü, lai kanga junga asaya la den asayatem ka khen ka khen ta kokyonga atu.

Mezüngbuba asaya nung lai Korea tsür Miran Cheon minute

1 ser second 30 nung akok.

Tanabuba bout nung lai Cambodia tsür Smanang Dit second 67 nung koka tetsür 50kg category semifinal tongteta liasü.

Semi nung la arishi küm 19 tain Kazakh tsür Laura Ganikyzy den terabo toktepa asaya ajisüaka lai iba asaya-a koka liasü.

50kg category selection trials nung takok anguba sülen Vinesh ya iba asayamung nung asaya-a liasü.

Iba tetoktepba nung final tonga asayatem 2024 Summer Olympics nung asayatsü atema quota agütsür.

Kasa asayamung nung India nung asayatem ano quota asem angutsü maongka lir, kechiyong Anshu Malik (57kg), Mansi Ahlawat (62kg) aser Reetika (76kg) nung ajak parnok tata asaya nung semifinal tongtetogo.

2021 World Championship silver medallist Anshu-i quarterfinal nung Kyrgyzstan tsür Kalmira Bilimbekova technical superiority akok.

Kasa mapang nung U23 world champion Reetika-ia kanga mebelemi Eunju Hwang koka liasü. Reetika-i iba asaya nung Korea tsürla ya technical superiority agi akok aser taruba asaya nung Mongolia tsür Davaanasan Enkh Amar koka liasü. Reetika-isa, China tsür Juang Wang koka liasü.

Mansi-ia, Kazakhstan tsür Irina Kuznetsova koka semifinal tonga liasü.

India team nungi Nisha Dahiya-i (68kg) dang semifinal metongteti liasü. La Meerim Zhumanazarova-i tsükdaksü.

Paris Games atema quota angutsü asoshi Turkey nung May 9 nungi tenzüka asayatsü aliba World Qualifiers ya tatembangbuba asütsü.

SOT 1: Bhaker, Anish na temaba jenjang nung tembang

Rongchii/April 20, 2024


(Agencies): Shooting Olympics selection trails 1 nung Honibarnü mezüngbuba anogo Manu Bhaker-i tetsür 25m pistol qualification amokbaner aaya-a point trok agi world record score ajatetogo aser Anish Bhanwala-i tebur 25m rapid-fire pistol Olympics Selection (OST) Trials 1 kokogo.

Dr Karni Singh Shooting Range nung tetsür 25m pistol qualification nung Olympian Manu temaba jenjang nung liasü.

Tetsür asaya final nung Manu-i tanga asayatem dang nungi alakteta tajungba asaya-a five rapid-fire shots, 10 series nung la indang score 4,4,5,5,5,5,4,5,5 aser 5 liasü.

Series tenetbuba sülen Esha Singh-i point 23 dang nguteta la tsük aser iba mapang Manu-ibo point 32 nguteta la Rhythm Sangwan aser Abhidnya na dang nungi point trok agi timba liasü.

Ajisüaka tetsür 25m pistol OST nung Esha maneni temaba jenjang nung alitsü, kechiyong lai Hokolbarnü qualifying nung point 585 ngua lir aser iba ajanga



Manu Bhaker

tetsür asayar pongu rongnung la temaba jenjangi atutsü asoshi teyari agütsüogo.

La sülen Manu tanabuba jenjang nung lir aser tasembuba, pezübuba aser pongububa nung Simranpreet, Abhidnya aser Rhythm lir.

Tebur RFP nung Anish-ia kanga junga asaya-a point 33 angu aser pa tanabuba jenjang nung alisang Vijayveer Sidhu dang nungi point trok agi timba liasü. Adarsh Singh-ia point 23 ngua pa tasembuba nung tembang.

Qualifications nung Bhavesh Shekhawat temaba jenjang nung liasü saka pai point 18 dang nguteta pa pezübuba aser Ankur Goel-i point 10 ngua pa pongububa nung liasü.

BILEMDANGANG

"Tasa tasen ka angazüksü asoshi kecha temonu mali."